

720x

Tsinde la vha ha Tshishonga, Vhandalamo, vha ri o bvaho Vhukalanga dzina lawe vhukuma a li tsha divhiwa. Lo xela-xela nga maitele awe, ngauri o vha e muthu we a vha a tshi dina vhathu a sa shumi, a tshi sokou vuwa a bva a ya midini ya Vhakalanga a tshimbila a tshidzhia zwiliwa zwavho, mavhele kana mbudzi. Fhedzi o vha a sa iti u thuba zwothe, o vha a tshi dzhia tshithihi, o no fhedza a di ita ngauralokha mudi na mudi. Ndi hone Vhakalanga vha tshi mu nea dzina la u pfi "Dumbu-ranyika ri singa guti kanyi". Ndi uri "Thumbu ya shango i sa fushwi ngazwahayani", la mbo vha lone dzina la u hulaho u swika hu tshi xela dzina lawe, ha sala muano wawe wa uri "Tshishonge".

Vhanwe vha ri Tshishonge o vha e kaaladzi yawe, ngauri zwiendo vhukuma na muano wavho ndi vho-Ramovha. O vha e khosi a tshi di-linga. Musanda wawe wo vha u Nzhelele. Onoyo vha ri o beba Tshisudzungwane, Tshisudzungwane o beba Rathophi, Rathophi o beba Lugube. Ndi ene we a pfulutshela Tshifudi. Lugube o beba Ra-lulimi-lwandou-lwo-sala-thohoni. O o beba Lalumbe. Khosi inwe ya ngei Nzhelele a ri ndi nne "Thoho-ya-ndou-yo-salamuvoni", ndi uri yo sala he ya viiwa hone, a i naa nga i hwalaho. Ndi ene wa vha ha Ramabulana. Nga tshifhinga tsha Lugube ndi hone he vha fhandakana tshothe na avha vha Ramabulana na vha ha Tshivhasa, fhedzi vhe fhethu huthihi (Nzhelele).

Zwino nga murahu ndi hone vha ha Tshishonge vha tshi zwi vhona uri a si zwone ri tshi dzula fhethu huthihi, vha bva Dzata vha da Mukula. Ndi hone he vha fhandakana hone, vhanwe vha ya Khubvi, vhanwe Tswinga, vhanwe Ha-Tumbala, vhanwe Ha-Muila tsini ha Tshikhusesese, vhanwe Tshihanane, vhanwe (vha ha Mamburu) vha sela Mukula. Ene thoho yavho Ralulimi a yo dzula Tshifudi. Ndi hone he Ralulimi a vhulawa nga vha Mbilwi,

vha ha Mphaphuli, e hone. Vhanwe vha sala Dzata vha re hone na la namusi, vhanwe vha tuwa na vha ha Tshivhasa vha hone la namusi (Mukumbani). Musi vho bva Dzata vho nzhenana ndwani dza Vhangona ngauri o vha e mashango avho, Vhangona vha kundwa nga vha ha Tshishonga vha luvha.

Mafhungo a vha ha Tshikundamalema. Ndi Vhandalamo, vha bvakha Lugube o beba Ralulimi na Lufhafhe. Onoyo Lufhafhe, nge a vha a tshee mutuku, vho mu isa Ha-Tumbala na mme awe na vhanwe vhathu uri vha mu lele hone, vhone mme vhe khosi. Mme awe o maliwa e wa lushaka lwa mahosi aa Tshakhuma, o dzama ha nzhenana nwana Lufhafhe a vha khosi. Onoyo o u dzama, ha nzhenana nwana wawe a no pfi Ludwavha.

Musi vha tshi dzula kutavhani ku no pfi Matokota, hanefha ndi hone he ha da lunwe lushaka lu no pfi Malema, ndi lushaka lwe lwa vha lu tshi bva dzimmbi dzavho vha tshimbila lu songo ambara sa Mabunyu. Vho vha vho no kunda vathu vhanzhi, Vhavenda vha tshi ri u vha vhona vha sokou shavha vha sia zwothe, mavhele, zwifumo. Zwino vha tshi swika Ha-Tumbala vha wana vho no vhamba maano a u lwa navho, vho fhata mitsheto na dzingole ntha ha mitsheto, vho vheya matombo. Vho swika tsini vha ritha matombo vha tshi ri ri a swika, vha a ritha a vha wela ntha, vha ri ri a humela murahu na hone ho vha ho no vha na vhathuvha a ritha a vha wela ntha vha fa sa dzimbevha.

Zwino vha livhanyamu-lamboni u no pfi Thahari, vhanwa zwino vha tsa vha vha vhilimedza vha welaluphirimani vha vha pfula nga misevhe hu si tshee na muthihi wavho o no dovha u rembuluwa u lwa. O bvaho ndwani iyo ho ngo tsha dovha u lwa na muthu arali hu si u shavha na u shavha o livha hayani hawe, ndi hone vha tshi huma u yo fhedzisa dzikhuvhabvu dzo huvhadzwaho nga matombo. Ndi hone Ludwavha a tshiri ndi nne Tshikunda-Malema, ngauri

o kunda lushaka lwe lwa vha lwo fhedza vhathu na mavhele na zwifuwo zwavho.

Ludwavha a beba Khangale, mme awe ndi vha ha Gumbu. Ha ri u dzama Ludwavha, aa nzhena ene Khangale a vha khosi ya ha Tshikundamalema, ho no fa dzina la uri Ha-Tumbala. Zwenezwo o no nzhena Khangale ha shuluwa dzimmbi nnzhi, ho thoma murathu wawe ane a pfi Mashige, a shandukela mukomana wawe a ya a ramba Magiledzhi, khosi ya Thengwe, vha lwa nae o no pfulutshela Mpu-mbuluni.

Vha tshi vhona uri a ri mu koni, vha ya u ramba vha Ha-Tshivhasa vha tangana na vha Thengwe, ndi hone Khangale a tshi bva nga u shavha a ya Khubvi, ha sala Mashige e khosi yalothela Ha-Tshikundamalema.

Zwino Khangale e Khubvi ha da Mabunyu e a dia Lwamondo, ene a yakhao a vha disa Muledzhi he ha vha hu hone musanda we Mashige a vha a tshi vhusa e hone, vha pandela Mashige a vha a tshi vhusa e hone, vha na Magiledzhi.

Ndi hone Khangale a tshi sala Muledzhi e khosi, zwino Magiledzhi khosi ya Thengwe a tshi vhuya hayani Thengwe, a ramba vha Ha-Tshivhasa vha da vha wana vho no edela. Ho vha hu na vhaeni vho lala khoroni vha bvaho kule, vha mbo di vha vhulaha, zwino ndi hone vhane vha mudi vha tshi vuwa vha lwa navho vha vha pandela vha shavha hu songo vhulawa na muthihi wa afho.

Nga linwe duvha nduna ya Khangale we a vha a tshi pfi Madzwuse a tshi ya u zwima mbila a wana bako lihulu li re thavhani i no pfi Maholoni, a vhuya a tshi ri, "Vha musanda, fhanono a ro ngo dzula zwavhudi. Wdo wana bako la vhuswina line ri nga si moniwe nga maswina". Nga murahu ha zwenezwo vha mbo di pfuluwa vha ya hone. Vho no vha hanefho, vha Thengwe vha dovha vha ramba vha Ha-Tshivhasa vha da masiari, vha vha wana vhe henefho bakoni, ya tangana ha vhu-

lawa na nwana wa Tshivhase a no pfi Makhadi, murathu wa Ramarumo, na vhathu vhanzhi. Ndi hone vha tshi shavha vha mu sia hone.

Nga linwe duvha vha dovha vha vha dodela vha wana musadzi ane a pfi Nyalutongopfa e tsimuni, vha mu vhulaha na nwana wawewa musidzana a no pfi Lutongopfa.

Ndi hone nwana wa Magiledzhi a no pfi Nengudza, khosi a Ne-Thengwe a re hone, nga linwe duvha a bva a songo onesa khotsi, a ya ha Tshikundamalema a ri u swika a wana vhasadzi vhe masimuni. Vha tshi mu vhona vha toda u mu shavha a ri, "Ni songo shavha, iyani ni mbidzele vho-Tshikundamalema". Vha ya vha hanelela khosi zwenezwo zve vha vhudzwa.

Ndi hone a tshi takuwa a ya hone a swika a dzula nga kule. Nengudza a ri, "Ndo da u ri ndi pfane na vhona uri kha ri litshehezwi zwa u dzula ri tshil lwa. U bva nemusi nndwaka i fhele, ri tshimbidzane ri malelane." Ndi hone nga murahu vho-Tshikundamalema vha tshi ruma vhathu vha ya ha Magiledzhi pfa uri zwo fhela-na. Nangoho vha vhuya vha tshi ri zwo fhela, ndi hone vha tshi tshimbidzana vha malelana.

Ndi hone Magiledzhi a tshi vhuya a dzama, i pfano na Tshikundamalema, a dzamavho vha kha di pfana. Ndi hone hu tshi nzhena nwana wawe Tshiakhatho, ha fhela minwaha miraru pfano ya fhela, ha vuwa nndwa na Nengudza khosi ya Thengwe, onoula we a thoma u ri nndwaka i fhele. A ya a ramba mmbi Ha-Tshivhasa, vha da vha lwa nae a vha vhulaha nga vhunzhi a vha rwa dzi-thoho nga tshigidi tsha Martin u swika li tshi kovhela e navho; murahu hune vha ri ri a ima a rwa thoh a sala o fa, vha gidima a tevhela a tshi di ralo. Vho ya hayani vha dovha vha rambana vha vhuya vha tanganga thavha yothe, vha twa maduvha mararu hu tshi lwiwa, shango li nukha musili. Naho zwo ralo vho vha

vhulaha vhukuma, ha vhulawa nduna ine ya vha yone ya u netshedza dzigulu khosi.

Ndi hone ya shavha, vha dovha vha ramba inwe vha vhuya vha mona nga murahu ha dzithavha dza ha Tshikundamalema vha wela mula-mbo u no pfi Mbodi, vha elelwa inwe nduna ya Tshikundamalema ye ya vhayo dzula hu no pfi Maseha tsini ha Dambale, vhubvadvha ha Tshiungani. Ne-Maseha a vha vhilimedza a vhulaya vhavhili, ndi hone vha tshi shavha vhothe vha Thengwe na vha ha Tshivhase.

Vha dovha vha ramba inwe, vha da u dia Tshirunzini na kha kunwe kudi; ndi he vha vhulaya vhatuvhana, mukalaha na mukegulu na musadzi a na nwana mutanani, musadzi o rungiwa nga pfumo, nwana vha rwa nga thonga. Vhusiku musadzi e vuwa a shavha a ya midini ya vha hawe na nwana, a vuwa vha mbo di vha lafha vha tshila, a tshi pfi Phophi.

Zwino vha tshi vhona uri u lwa ri tshi ita ri tshi tuwa a zwi ri farisi tshithu, ndi hone vha tshi nzehena kha inwe thavha i no pfi Tshamuulwi, vha hada vha fhata mudi, vha dzula hone vho lindela u lwa. Ndi hone Tshikundamalema a tshi ya a vha balanganya vha bva, ha vhulawa Matsetli, muthu wa Tshikundamalema.

Vha dovha vha rambana vha ya kha inwe thavha Khulinga, vha kuvhangana hone ha fhatwa mitsheho. Tshikundamalema a ya hone na mmbi yawe, ya lwiwa ha vhulawa murathu wa Tshikundamalema a no pfi Manenzhe. Ndi hone vha tshi nzehena mudi uyo vha u fhisa.

U bva lenelo divha vhothe a vho ngo tsha dovha vha lwa nae Tshikundamalema. Ha-tshi ri vha Ha-Makuya vha tshi ri ri a mu dodela nga murahu ha dzithavha, vha wela Mutale vha wela Mbodi vha da Tshipise vha thuba dzikholomo vha vhulaya vhatu. Tshikundamalema a tshi zwi pfa a ramba yawe a da u dia Ha-Makuya, vha thuba dzikholomo dza vha Ha-Makuya vha thubulula na dzila xzavho.

Hu tshi da vhatu vhatshena, ndi hone vho-Tshivhasa Ramarumo vha tshi ya ha Tshikundamalema vha ri, "Nd a vhona, Tshikhuwa tsho swika; arali na ima ni nothe ni nge yi kule-kule, a ni nga pfi zwine vha do amba. Arali vha tshi ni vhudzisa uri khosi yanu, ni ri ndi Tshivhase." Nga u vhona uri Gamba i tsini na Tshivhase ndi hone vha tshi tenda khosi ndi Tshivhase, zwa ralo u swika zwino nne ndi re hone.

Tshiakhatho o dzama nwaha wa 1920 (?), ha kona u dzehena nne Hanyani Tshiakhatho, ndi nne ndo nwalisaho (1945). Ndi muduhulu wa Vhanyai vha Mangaya, fhedzi Vhandalamo na vha ha Tshivhasa, mutupo na zwino ndi muthihi fhamuthihi na vha ha Tshivhasa, mutupo na zwino ndi muthihi, vho fhambana u ana, munwe uri Tshivhumbwe, munwe a ri Tshishonge. Zwi a pfallanyana nga uri muano ndi madzina a dzikhaladzi.